


PRIVREDNA/GOSPODARSKA KOMORA
FEDERACIJE BOSNE I HERCEGOVINE
CHAMBER OF ECONOMY OF THE FEDERATION OF BOSNIA AND HERZEGOVINA

Industrija tekstila, odjeće, kože i obuće, FBiH



*Sarajevo,
novembar, 2017. godina
broj 4.*

B BELLISSIMA



U ovom izdanju donosimo:

Održan Info dan tekstilne i kožarsko preradivačke industrije

Novosti bh kompanija

Statistički prikaz sektora

Info dan tekstilne i kožarsko prerađivačke industrije



Bosna i Hercegovina ima dugu tradiciju tekstilne i kožarsko-prerađivačke industrije, što potvrđuje i činjenica da je upravo na teritorije BiH, u Visokom, 1929. godine otvorena prva “Stručno-zanatsko-kožarska škola Visoko”, u kojoj su se školovali budući kadrovi za kožarsku industriju iz svih dijelova tadašnje Jugoslavije.

Početak prošlog vijeka tadašnji zanatski način, zamijenjuje savremena i moderna proizvodnja gotovih proizvoda. Iako nikada nije smatrana jednom od prioritarnih grana privrede do 90.-tih godina ova industrijska grana postizala je izuzetne rezultate, i u velikoj mjeri doprinosila uravnoteženju vanjskotrgovinskog bilansa. Današnji globalni poslovni ambijent pretrpio je značajne promjene i potpuno je drugačiji u odnosu na njen razvoj početkom 90.-tih godina.

Unatoč brojnim problemima sa kojima se suočavaju privrednici iz ovog sektora kao što su nepostojanje bazne proizvodnje, visoke carinske stope, zakonska regulativa, brojni nameti, nedostatak kadrova... ipak se nižu veliki uspjesi kompanija, koje i pored lohn poslova nastoje razviti proizvodnju vlastitih gotovih proizvoda.

Privredna/Gospodarska komora FBiH nastoji kroz različite aktivnosti dati svoj doprinos na jačanju i daljem razvoju, značajne okosnice industrije u BiH.

Obzirom na evidentan rast tekstilne i kožarsko-prerađivačke industrije u Bosni i Hercegovini, u skladu sa svojim planiranim aktivnostima Privredna komora FBiH i Fakultet za tehničke studije Univerziteta u Travniku organizirali su prvi "Info dan tekstilne i kožarsko prerađivačke industrije". Info dan se održao 27.10.2017.godine u prostorijama Fakulteta za tehničke studije, ul.Aleja konzula br. 5, u Travniku - gradu koji je kroz svoj historijski razvoj poznat po tekstilnoj i obućarskoj industriji.



Partner projekta je proizvođač strojeva “JUKI” Central Europe. Generalni direktor gosp. Masanori Awasaki i product manager gosp. Kamen Nedyalkov prisutnima su predstavili i prezentirali nove tehnologije u proizvodnji.



Masanori Awasaki, generalni dir. JUKI




Kamen Nedyalkov, JUKI CENTRAL EUROPE

U okviru Info dana tekstilne i kožarsko-prerađivačke industrije pripremljen je sadržajan program-agenda, kao i Okrugli stol na temu: Strojevi i oprema u funkciji razvoja tekstilne i kožarsko-prerađivačke industrije. Budućnost tekstilne industrije u Bosni i Hercegovine treba posmatrati sa stajališta ljudskih resursa, fizičkih i materijalnih kapaciteta u kojima strojevi kao alati igraju važnu ulogu kojoj treba posvetiti posebnu pažnju.

Kako je uspjeh svake industrijske grane ovisan o kvalitetnom proizvodu koji je potrebno osigurati tokom cijelog proizvodnog procesa, stručno predavanje na tu temu održao je doc.dr. Samir Pačavar, voditelj smjera tekstilnog inženjerstva i dizajna Fakulteta za tehničke studije. Stručno predavanje o iglama za šivanje održao je gosp. Mirsad Konaković, predstavnik koompanije Komasa-komerce Sarajevo.



Sredstvima Federalnog ministarstva obrazovanja i nauke finansirat će se Projekat opremanja tekstilnog kabineta u SSŠ „Džemal Bijedić“ u Goraždu



Nakon sastanka s predstavnicima Njemačkog društva za međunarodnu saradnju GIZ-a na kojem je bilo govora o unaprjeđenju stručnog obrazovanja i praktične nastave u srednjoškolskim obrazovnim ustanovama na području Bosansko-podrinjskog kantona Goražde, u prostorijama Ministarstva za obrazovanje, mlade, nauku, kulturu i sport potpisan je Ugovor o finansiranju projekta iz oblasti poboljšanja kvaliteta praktične nastave u srednjem obrazovanju.

Radi se o ugovoru vrijednom 12.000,00 KM koji će biti realizovan u sklopu Programa podrške projektima poboljšanja kvaliteta praktične nastave u srednjem obrazovanju Federalnog ministarstva obrazovanja i nauke. Iz ovih sredstava, kako je istaknuto, finansirat će se Projekat opremanja radionice praktične nastave tekstilne struke u SSŠ „Džemal Bijedić“ u Goraždu, čime će učenicima koji se obrazuju za zanimanje tekstilnog tehničara biti omogućeni bolji i savremeniji uslovi rada.

Ugovor s Federalnim ministarstvom potpisao je resorni ministar Damir Žuga koji je ovom prilikom izrazio posebno zadovoljstvo zbog skore realizacije još jednog projekta u okviru kojeg će se stvoriti bolji uslovi za izvođenje praktične nastave u srednjim školama na području BPK Goražde.



Zahvaljujući povoljnim kreditnim linijama otvorena 2.182 radna mjesta



Vlada Federacije Bosne i Hercegovine usvojila je na 119. sjednici u Sarajevu Informaciju Ministarstva energije, rudarstva i industrije o realizaciji kreditnih sredstava plasiranih putem Union banke za period od 2013. do 2016. godine kao i Izvještaj Union banke o portfoliju komercijalnih kredita ovog ministarstva.

U ovoj informaciji navedeno je da je namjena prve kreditne linije, između ostaloga, finansiranje modernizacije tehnološkog procesa. Tom mjerom za tri godine bilo je obuhvaćeno 98 privrednih subjekata, s 39,5 miliona KM kreditnih sredstva.

Cilj druge kreditne linije je očuvanje radnih mjesta kroz finansiranje uplata za Penziono-invalidsko osiguranje (PIO) za zaposlenike koji su stekli uvjete za odlazak u penziju. Za tri godine za ove namjene dodijeljeno je 1,9 miliona KM.

Sekretar Federalnog ministarstva energije, rudarstva i industrije Stipo Buljan podsjetio je da se putem ovog ministarstva od nastanka pomagalo privrednim društvima u smislu grantova, ali je 2014. uspostavljen trajni Revolving fond s ciljem da se u nekoliko narednih godina napravi iznos od oko 100 miliona KM te da se firme koje ispunjavaju uvjete mogu prijaviti i dobiti sredstava iz Fonda.

"Sredstva su s 0,9 posto kamate, 0,5 obrade te su sveukupna davanja manja od 1,5 posto na grejs period od godinu dana i na 60 mjeseci otplate kredita. Od godine do godine iznos se mijenjao. Nekada je maksimum bio 800.000 KM, nekada 500.000 KM. Ministarstvo nije imalo strukturirano sredstava za ovu namjenu za 2017. godinu, ali smo putem Fonda

opskrbili oko pet miliona KM što će ove godine biti podijeljeno", pojasnio je Buljan.

Direktor Union banke Vedran Hadžiahmetović istaknuo je da se radi o izuzetno kvalitetnom kreditnom portfoliju čije je kvalitet iznad prosjeka bankarskog sektora za kredite pravnim osobama u Federaciji BiH, dodajući da su rezultate potvrdili analizom dostupnih zvaničnih finansijskih i poslovnih pokazatelja privrednih subjekata korisnika kreditne linije, ali i izvršenom anketom među korisnicima.

Izdvojio je dva osnovna rezultata ovih kreditnih linija među kojima su ostvareni pomaci u svim ključnim segmentima poslovanja, prvenstveno su porasli ukupni prihodi za više od 154 miliona KM, dok je u segmentu zapošljavanja došlo do procentualnog značajnog rasta u 26 posto, odnosno otvorena su 2.182 nova radna mjesta.

"Ove pokazatelje potvrdila je i anketa korisnika koji su kazali da su ovi krediti doprinijeli i uticali da se ostvare ovakvi rezultati", naglasio je Hadžiahmetović, dodajući i to da je oko 97 posto privrednih subjekata u kategoriji "A" prema standardima Agencije za bankarstvo, što znači da nisu u kašnjenju s otplatom ili da su kašnjenja manja do 30 dana.

Kada je u pitanju potrebna dokumentacija za ove kredite, ona je slična kao i kod ostalog komercijalnog kreditiranja, uz svu neophodnu dokumentaciju o poslovanju potrebno je dostaviti i poslovni plan, a za osiguranje vraćanja kredita uzeta je hipoteka, odnosno založno pravo nad nekretninama ili kombinacija sa zalogom na pokretninama.

Alto mašina za šivenje



Alto revolucionarni šivaći stroj, dizajnerke Sarah Dickens osmišljen je u cilju da šivanje i popravljanje bude jednostavnije i elegantnije. Sarah Dickinsova sudjelovala je na natječaju dizajna Zaklade James Dyson, sa temom inovativni kućanski aparati. Koncept Alto šivaćeg stroja dobio je vrlo pozitivne kritike stručnjaka, a još veći pozitivan odgovor kod krajnjih korisnika. Kako bi kod budućih korisnika razvila ljubav prema šivanju i krojenju odlučila se na dizajniranje šivaće mašine koja će to ispuniti. Istraživanje koje je provela otkrilo je da popularnost šivaćih strojeva pada uglavnom zbog toga što neiskusni korisnici smatraju da je teško upravljati šivaćim strojem. Stoga, došla je na ideju da dizajn inovativnog proizvoda moradobro funkcionisati ali i biti jednostavan za korištenje. Problem nogu / pedala i koordinacije kretanja tkanina riješen je s tehnologijom senzora sile. Senzori u gumenoj podlozi ispod stroja omogućuju početniku da kontrolira brzinu, bez obzira na položaj ručke, koji su najprikladniji. Osim toga, fleksibilna pogonska osovina zamjenjuje tradicionalni sustav remenica kako bi se stvorio Altoov karakterističan oblik luka, povećavajući dostupan radni prostor za šivanje i poboljšanje vidljivosti. Osim funkcionalnosti Alto šivaći stroj sa toplim materijalima i retro modernim stilom ima i izvrsnu estetiku.



Novosti bh kompanija

Alma Ras otvorila vrata butika u Mariboru i Ljubljani



„Svako novo tržište zahtjeva i poseban kvalitet, što nam daje imperativ i motiv za konstantnim usavršavanjem i napredovanjem. Vjerujem da ćemo opravdati povjerenje kupaca i ponuditi im unikatan proizvod koji će po dizajnu, kvaliteti i asortimanu biti u vrhu njihove potražnje“, istakao je Rasim Memagić, izvršni direktor kompanije Alma Ras.

U drugoj polovini augusta svečanom ceremonijom u Mercator Centru otvorena su vrata Alma Ras butika u Mariboru i u Ljubljani. Na ovaj način pored BiH, Crne Gore, Kosova, Makedonije, Danske i stanovnici Slovenije moći će se uvjeriti u kvalitet proizvoda te uživati u finom donjem rublju i spavaćem programu brendova Alma Ras i Manners, a koji su prepoznatljivi po vrhunskim kreacijama od najfinijih materijala evropskog porijekla.

ALMA RAS

Promocije kolekcije jesen/zima 2017./2018.

Za predstojeću sezonu, brend Alma Ras vam donosi prepoznatljive modele, ali i kreacije koje će zadovoljiti i one najizbirljivije. Kombinacijom raskošne čipke i kvalitetnih prirodnih materijala evropskog porijekla, te upotrebom finih suptilnih detalja kreirani su neodoljivi komadi donjeg rublja i spavaćeg programa. Noviteti u ovoj sezoni je i ekskluzivna linija nastala saradnjom Alma Ras kreativnog tima i **Amre Silajdžić-Džeko**.



Višegodišnje iskustvo sa obje strane prožeto je ekskluzivnom linijom „Natali“, a nove ideje ogledaju se u dizajnerskim detaljima i zasigurno će oduševiti sve pripadnice ljepšeg spola. Kolekciju krase i specijalno izdanje, a kombinacija pliša i čipke zasigurno će biti hit ove sezone.

Brend Manners ove sezone naglašava „stil pravog muškarca“, naročito kroz ekskluzivne linije čiji dizajn i krojevi prate figuru u svakoj životnoj situaciji.

Kroz svaku novu kolekciju, kvalitetom i dizajnom nastoje se ipuniti očekivanja kupaca, i to je ono što ovu kompaniju čini vodećim brendom donjeg rublja u BiH.

Firma iz Maglaja proizvodi 55.000 košulja za švicarsku vojsku



Kompanija "Bontex" iz Maglaja ulazi u veliki posao isporuke 55.000 košulja za pripadnike švicarske vojske, sa švicarskim partnerom, firmom "Weder-Meier".

Bio je to i razlog posjete delegacije iz Švicarske ovoj uspješnoj maglajskoj firmi. Da bi se ispoštovali rokovi, iz Bontexa će se sedmično isporučivati i do 8.000 košulja.

Bontex postoji već 13 godina i proizvodi muške i ženske košulje koje plasira na zapadno tržište. Danas kompanija ima nešto više od 200 zaposlenika, a planira povećati taj broj jer zahtjevi tržišta su sve veći.

"Prinučeni smo smanjiti proizvodnju modnih košulja, a sve više se okrećemo proizvodnji modnih bluza i košulja koje su pored švicarske vojske namijenjene i pripadnicima Ministarstva za pravosuđe Slovenije. Ipak, za švicarsko tržište smo zadržali 50-ak kupaca za koje proizvodimo i modne bluze", rekao je Senaid Husić, vlasnik Bontexa.

Da bi se ispoštovali rokovi, bit će potrebno još radnika, priča Husić i dodaje da se mnogo investira u obuku radnika, a nakon toga neki odustaju od posla.

"Posla će biti, samo mi trebaju radnici", dodaje Husić.

Čelnici firme Weder-Meier naglasili su kako imaju izuzetno uspješnu saradnju s kompanijom Bontex, a to je doprinijelo realizaciji važnih ugovora. Bojan Mamula, direktor Weder-Meier isktaknuo je da je najvažniji kvalitet proizvoda i poštivanje rokova isporuke.

Kako se u Bontexu proizvode košulje namijenjene za njihove pripadnike mogli su se uvjeriti i predstavnici švicarske vojske.

"Vojska Švicarske raspisala je međunarodni tender za isporuku košulja, Weder-Meier i Bontex su uspjeli dobiti ovaj posao i mi smo zadovoljni onim što smo vidjeli u ovoj firmi. U ovoj godini predviđena je proizvodnja 55.000 košulja, dio je već isporučen. Imamo planove i za narednu godinu, ali o njima kasnije", izjavio je u Maglaju Andreas Stier, predstavnik vojske Švicarske.

Švicarski Forster Rohner otvorio pogon na Ilidži, zaposlena 22 radnika

Švicarska kompanija Forster Rohner AG u mjesecu oktobru otvorila je proizvodni pogon u Hrasnici. Vođeni stogodišnjim iskustvom u izradi tekstilnog veza i obrade profinjenog i kvalitetnog platna širenjem proizvodnje na područje BiH otvara nove prilike za bh radnike.

U otvorenom pogonu proizvoditi će se najkvalitetniji i najprefinjeniji elegantni materijali čiji se proizvodi mogu vidjeti na modnim manifestacijama i koji nemaju konkurenta kada su pitanju materijali ovakve vrste i izvozit će se izvan granica BiH.



Radi se od "hand made" izradi koja je neophodna i kod dijela industrijskog veza gdje postoji etapa koja na kraju iziskuje ručnu doradu. Inače, radi se o tekstilnoj kompaniji sa stogodišnjom tradicijom koja širom svijeta zapošljava 800 ljudi, od toga 200 u Švajcarskoj.

Specijalizirala se za proizvode nastale finim i inovativnim vezom te doradu i ukrašavanje tekstila.

Firmu tvorničkog veza osnovao je Conrad Forster Willi 1904. godine koja je do danas doživjela brojne transformacije. Firmu danas vodi Emanuel Forster, prvi unuk osnivača firme.

Otvoren pogon kompanije KAVAT

Nakon osam godina rada u ne tako dobrim uvjetima u krugu travničke fabrike „Borac“, švedska firma „Kavat“, najpoznatija po proizvodnji visoko kvalitetne obuće za djecu, otvorila je moderni pogon u novotravničkoj industrijskoj zoni „Neobarje“.

U novom pogonu, na oko 5.000 kvadrata uposlenicima su pruženi moderniji uvjeti rada. Kompanija godišnje proizvodi 300.000 pari obuće, ali se očekuju i nova upošljavanja kao i povećanje proizvodnje. Trenutno ova kompanija upošljava 160 radnika.

Cjelokupna investicija vrijedna je oko 3 miliona KM i radi se domaćoj investiciji bosanske filijale firme, koja je rezultat dobrog poslovanja u prethodnim godinama.

Kompanija kroz ljubav i znanje, te veliku dugu tradiciju u proizvodnji obuće danas dobar dio repromaterijala dolazi iz regiona, a u proizvodnji koriste ekološke materijale. Proizvodi nose etiketu "Made in BiH" i kao takvi mnogo su zanimljivi u Švedskoj.

Oko 98% obuće Kavat proizvedene u BiH ide na inostrano tržište, i to zemlje Skandinavskog područja, a jedan dio u Njemačku i Austriju.



Otvoren novi pogon kompanije Koteks u Zavidovićima

Nakon dvije decenije uspješnog poslovanja kompanija Koteks iz Tešnja svoja je iskustva prenijela u Zavidoviće. U novembru u nekadašnjem DC "Stoličara" u IP "Krivaja" u Zavidovićima Koteks je otvorio još jednu podružnicu. U tekstilnom pogonu, prostoru od skoro 2.500 kvadrata, koji je opremljen savremenim mašinama, proizvodit će se policijska i vojna oprema, presvlake za namještaj i auto-indrustriju, te zaštitna i službena odjeća od kože i tekstila.



Iako je otvorenje novog tekstilnog pogona firme Koteks Tešanj u Zavidovićima bilo najavljeno za juni, do tog nije došlo, jer zbog lošeg stanja prostora adaptacija je trajala duže nego što se očekivalo. Podršku i zadovoljstvo pokretanjem ovog pogona svakako su iskazali i predstavnici općine Zavidovići.



U prvoj fazi je zaposleno 55 radnika, a još najmanje 50 radnih mjesta bit će uposleno do kraja godine. Konačan plan, prema riječima izvršnog direktora, Harisa Sejdića, je popunjavanje kapaciteta od 250 radnih mjesta. Kompletna proizvodnja namjenjena je za evropsko tržište. U narednom periodu planirana je novu investiciju u Krivajinom pogonu u koju će uložiti oko 1,6 miliona maraka, a radi se o pokretanju proizvodnje stolica po čemu je "Stoličarka" i poznata u BiH. U više od dvije decenije postojanja firme uspostavljeni su odlični poslovni odnosi s dobavljačima i kupcima, a rade u skladu sa standardima ISO 9001-2008, ISO 14001-2004 i OHSAS 18001-2007. Sudeći prema dosadašnjim rezultatima kompanija "Koteks", koja je vodeća u otkupu, preradi i prodaji sirove kože i wet blue u Bosni i Hercegovini, u svom proizvodnom programu nudi funkcionalnost, udobnost i visok estetski dojam, a zahvaljujući kombinaciji kvalitetnih materijala i savremenog dizajna, svi proizvodi u potpunosti ispunjavaju svoju namjenu.

Srednjoškolski na radnom mjestu u KOTEKS-u

U saradnji sa Asocijacijom srednjoškolaca u BiH (ASuBiH) 20.10.2017. dva su učenika Mješovite srednje škole Tešanj "raspoređena" u preduzeću KOTEKS Tešanj.

Učenici će radno vrijeme od 08h do 16h provesti radeći poslove sa ostalim uposlenicima KOTEKS-a, a prema Ugovoru dnevnice za taj dan će biti uplaćene u Fond Socijalnog dana iz kojeg će se po završetku finansirati realizacija projekata mladih u lokalnim zajednicama.

Preko 800 bh. srednjoškolaca danas napušta svoje školske klupe i po prvi put odlaze na svoja „radna mjesta“ gdje će dobiti svoje prvo realno radno iskustvo.

Ove godine ASuBiH realizuje svoj drugi po redu „Socijalni dan“ i daje priliku srednjoškolicima da teoretsko znanje primjene makar na jedan dan u praksi kod preduzeća. U sklopu ovog projekta bit će uključene 34 lokalne zajednice širom BiH gdje će se omogućiti za preko 800 srednjoškolaca prvo radno iskustvo.

Saniteks na vodećem svjetskom sajmu medicinske opreme u Dusseldorfu



Kompanija Saniteks je uzela učešće na vodećem svjetskom sajmu medicinske opreme MEDICA u Dusseldorfu, koji se održao od 13.-16. novembra 2017.godine. Na sajmu su predstavljena inovativna rješenja medicinske opreme.

Predstavnici kompanije Saniteks predstavili su svoj proizvodni portfolio te obavili i niz sastanaka u cilju otvaranja novih tržišta.

- Kao jedini predstavnik BiH na ovom sajmu, zadovoljstvo nam je da možemo predstaviti potencijale BiH u oblasti proizvodnje medicinskih sredstava. Iskorak koji smo napravili izlaganjem na sajmu je u skladu sa našim ambicioznim planovima na osvajanju svjetskog tržišta i daljem širenju poslovanja - izjavio je direktor prodaje Sanitekso Nermin Kadrić.

Posjetioци su već prvi dan sajma pokazali značajan interes za asortiman ove kompanije te bi se i rezultati učešća mogli očekivati već u narednom periodu, saopćeno je iz Sanitekso.

MEDICA je najznačajniji događaj za medicinsku industriju širom svijeta i traje već 40 godina. U 17 sajamskih hala nastupa više od 5.100 izlagača iz 70 zemalja svijeta.

Saniteks je osnovan 1962. godine. U svojim proizvod-

nim procesima koristi savremene tehnologije, a asortiman čine proizvodi visokog kvaliteta. U dosadašnjem poslovanju Saniteks je ostvario saradnju sa renomiranim svjetskim kompanijama, a više od 50 posto ukupnog prihoda od prodaje realizira na izvoznom tržištu, najvećim dijelom u zemljama EU.



Iz komore

Održan sastanak sa predstavnikom italijanskog Udruženja Assomac



U prostorijama Privredne/Gospodarske komore FBiH, 25.10.2017.godine održan je sastanak sa predstavnikom italijanskog udruženja Assomac iz Vigevana – Pavia, g. Mario Pucci direktor za međunarodne odnose, i g. Muris Goralija, ITA - Odjel Ambasade Italije za promociju ekonomskih odnosa.

Assomac – Udruženje italijanskih proizvođača mašina i tehnologije za proizvodnju obuće i industriju kože je jedno od najstarijih udruženja u Italiji koje okuplja preko 150 firmi sa izuzetno jakom izvoznom orijentacijom. Osim toga udruženje Assomac je i organizator sajmova "SIMAC"- "Tanning Tech", vodećih sajamskih manifestacija mašina i opreme u kožarsko-obučarskoj industriji koji se održavaju u Italiji, zemlji koja se ubraja među najveće proizvođače cipela i kože na svijetu.

Direktor za međunarodne odnose g. Mario Pucci izvršio je prezentaciju dosadašnjih aktivnosti saradnje udruženja Assomac i bosanskohercegovačkih firmi.

Potpredsjednik P/G K FBiH, Mirsad Jašarspahić i sekretar Udruženja za tekstilnu i kožarsko prerađivački industriju P/G K FBiH, Jasmina Zejnilagić prezentirali su stanje ovog sektora, ostvarene izvozne rezultate i najbitnija izvozna tržišta. U FBiH velik broj kompanija bavi se ovom proizvodnom djelatnošću te su prezentirani i uspjesi bh kompanija. Evidentno je da kožarska industrija iz godine u godinu bilježi pozitivne trendove, što je rezultat investicija kompanija u tehnologiju ali i brzog reagovanja i kvalitetanih odgovora na zahtjeve poslovnih partnera. Na sastanku su razmjenjena mišljenja i relevantne informacije o perspektivama razvoja kožarsko-galanterijske i obućarske industrije u Federaciji Bosne i Hercegovine.

Zemlje Evropske Unije predstavljaju najznačajnije tržište za ovu bosansko-hercegovačku industrijsku granu, a top 3 zemlje u koje naše kompanije izvoze obuću su Italija, Njemačka i Austrija. Stoga, saradnje P/G K FBiH sa italijanskim Udruženjem Assomac otvara mogućnosti za jačanje, ali i uspostavljanje novih poslovnih prilika i kontakata između bosanskohercegovački i italijanskih kompanija.

Statistički prikaz sektora

U 2016. godini 39 novoosnovanih kompanija i 56 noosnovanih szr.

Broj uposlenih u 2017.godini iznosi 22.709 radnika, što je za 788 radnika više u odnosu na 2016.godinu.

Prema podacima Federalnog zavoda za zapošljavanje u 2016. godini broj nezaposlenih lica sa zanimanjem u struci tekstila, odjeće, kože i obuće je 10.582.

Izvoz	VII.2017.god.	(KM)
Ukupan izvoz sektora u BiH	882.130.653	
Udio izvoza TOKO FBiH	538.955.057	
TG 61-63 - odjeća	228.190.519	
TG 64 - obuća	179.637.092	
TG 41-43 - koža	104.590.345	
TG 50-60 - tekstilni materijali	26.537.092	

UVOZ-IZVOZ

Uvoz	VII.2017.god.	(KM)
Ukupan uvoz sektora u BiH	1.711.019.479	
Udio uvoza TOKO FBiH	1.345.636.284	
TG 61-63 - odjeća	312.824.267	
TG 64 - obuća	169.602.710	
TG 41-43 - koža	218.565.053	
TG 50-60 - tekstilni materijali	644.644.254	